



## "MEMBAZIR:SIFAT KEJI YANG WAJIB DIHINDARI"

الْحَمْدُ لِلَّهِ الْقَائِلِ: وَالَّذِينَ إِذَا أَنْفَقُوا لَمْ يُسْرِفُوا وَلَمْ يَقْتُرُوا  
وَكَانَ بَيْنَ ذَلِكَ قَوَامًا.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ  
أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى  
سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.  
أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، أَوْصِيكُمْ  
وَأَيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى:  
يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا  
وَأَنْتُمْ مُسْلِمُونَ.



## **Sidang Jumaat Yang Dirahmati Allah,**

Marilah kita sama-sama berusaha untuk meningkatkan keimanan kita kepada Allah S.W.T dalam setiap waktu dan keadaan, dengan sentiasa melakukan segala suruhan-Nya dan menjauhi segala larangan-Nya, mudah-mudahan dengan melakukan demikian kita akan beroleh kejayaan di dunia dan mendapat keredhaan Allah S.W.T di akhirat.

Pada hari Jumaat yang penuh berkat ini, marilah kita merenung sejenak ke dalam diri kita serta bermuhasabah mengenai apa yang telah kita lakukan dan patut laksanakan dalam setiap aktiviti seharian, agar ia selari dengan tuntutan syariat Islam. Satu tajuk yang kita akan bincangkan pada hari ini ialah mengenai satu sifat tercela yang sering dilakukan oleh segelintir masyarakat kita iaitu amalan suka membazir. Minbar Jumaat pada hari ini juga ingin mengajak semua umat Islam khususnya jemaah yang ada di sini agar sama-sama menghindari sifat suka membazir.

## **Sidang Jumaat Yang Dirahmati Allah,**

Kita sedia maklum bahawa Islam melarang keras umatnya mengamalkan cara hidup suka membazir dalam semua urusan kehidupan kita termasuk urusan yang berkaitan dengan perbelanjaan harta, pengurusan masa dan penggunaan tenaga. Perbuatan membazir merupakan satu tabiat buruk manusia yang sering terjadi apabila mereka dikurniakan rezeki atau nikmat yang banyak. Mereka seolah-olah lupa bahawa rezeki yang diperolehi itu sebenarnya kurniaan Allah S.W.T. Mereka menggunakan rezeki tersebut secara tidak wajar dan bukan pada tempat yang sepatutnya.



Sehubungan dengan itu, Imam As-Syafi'e menyatakan bahawa pembaziran itu ialah membelanjakan harta bukan pada jalan keperluan dan kebenaran, tetapi tidaklah dikatakan membazir jika dilakukan pada pekerjaan atau amal kebajikan.

### **Sidang Jumaat Yang Dirahmati Allah,**

Walaupun para ulama' lebih banyak mentakrifkan bahawa pembaziran itu hanya dalam lingkungan pembaziran harta sahaja, namun ia tidaklah mustahil berlaku pembaziran dalam perkara-perkara yang lain. Islam menetapkan bahawa apa sahaja perbuatan yang mengarah kepada pengurusan atau pekerjaan yang merugikan, maka ia juga termasuk dalam erti kata melakukan pembaziran.

Berdasarkan apa yang telah disebutkan tadi, maka pembaziran boleh dibahagikan kepada tiga bahagian;

- Pertama : Pembaziran harta.
- Kedua : Pembaziran masa.
- Ketiga : Pembaziran tenaga.

Ketiga-tiga jenis pembaziran ini boleh berlaku tanpa kesedaran kita. Ianya berpunca daripada kelalaian kerana terlalu ghairah mengejar cita-cita atau terlalu lemah dalam mengurus atau mentadbir sumber yang ada seperti masa dan tenaga.

Ibnu Al-Qayyim Al-Jauzi mengatakan, terdapat sembilan bentuk pembaziran yang sering dilakukan oleh manusia antaranya;

- Pertama : Pembaziran ilmu pengetahuan iaitu membazir jika tidak diamalkan pada jalan kebaikan.
- Kedua : Pembaziran amalan iaitu membazir jika melakukannya



dengan hati yang tidak ikhlas.

- Ketiga : Pembaziran kekayaan iaitu membazir jika dibelanjakan pada perkara yang tidak bermanfaat dan tidak diredhai Allah S.W.T.
- Keempat : Pembaziran hati iaitu membazir jika hati yang kosong kerana tidak mengasihi Allah S.W.T.
- Kelima : Pembaziran tubuh badan iaitu membazir jika tidak digunakan untuk beribadah kepada Allah S.W.T.
- Keenam : Pembaziran cinta iaitu membazir jika kita mencintai orang atau perkara lain melebihi cinta kepada Allah S.W.T.
- Ketujuh : Pembaziran masa iaitu membazir jika tidak digunakan dan diurus dengan sebaiknya.
- Kelapan : Pembaziran akal iaitu membazir jika memikirkan sesuatu yang hanya untuk dunia semata-mata tanpa bermanfaat kepada agama.
- Kesembilan : Pembaziran zikir iaitu membazir jika tidak menyebutnya dengan betul, hilang tumpuan, bermain-main atau sambil-lewa sahaja dan sebagainya.

### **Sidang Jumaat Yang Dirahmati Allah,**

Justeru, kita sebagai umat Islam perlu meninggalkan sifat suka membazir kerana sebagaimana yang telah diketahui bahawa membazir adalah satu sifat yang buruk dan keji.

Firman Allah S.W.T dalam surah Al-Israk ayat 27:

إِنَّ الْمُبَذِّرِينَ كَانُوا إِخْوَانَ الشَّيْطَانِ <sup>ص</sup> وَكَانَ الشَّيْطَانُ  
لِرَبِّهِ كَفُورًا





*“Sesungguhnya orang yang membazir itu adalah saudara-saudara Syaitan dan Syaitan itu pula adalah makhluk yang sangat kufur kepada Tuhannya”.*

*(Al-Israk: 27)*

Cuba kita lihat gaya segelintir masyarakat kita yang suka berbelanja mewah dan ianya seakan-akan menjadi satu budaya, dan yang lebih menyedihkan lagi ia berlaku bukan di kalangan orang yang berpendapatan tinggi sebaliknya berlaku di kalangan mereka yang berpendapatan sederhana dan rendah, yang cuba meniru gaya mewah sehingga lupa tanggungjawab kepada yang lebih utama.

Mereka sanggup mengeluarkan sejumlah wang yang besar semata-mata untuk hidup bermewah-mewah, berbelanja melebihi daripada keperluan, ghairah menukar atau membeli kenderaan baru bagi tujuan bermegah-megah. Sebaliknya begitu bakhil atau berhati-hati berbelanja bagi faedah anak-anak dan keluarga.

Oleh yang demikian, kita sebagai individu muslim hendaklah sentiasa mempertingkatkan usaha dengan menerapkan nilai-nilai Islam dalam setiap bidang dan pekerjaan yang diceburi. Kita hendaklah sedar dan sentiasa berusaha untuk melaksanakan tugas dan tanggungjawab menurut ajaran Islam. Di samping itu hendaklah kita berfikir panjang sebelum membuat sesuatu keputusan supaya tidak membawa kepada pembaziran.

### **Sidang Jumaat Yang Dirahmati Allah,**

Islam sangat menggalakkan amalan hidup bersederhana kerana ia menjadi asas kepada kesejahteraan dan kebahagiaan kita. Di samping mendorong supaya mudah membantu dan menolong orang-orang yang memerlukan sebagai



tanda kesyukuran kita dengan nikmat pemberian yang Allah SWT kurniakan kepada kita.

Firman Allah dalam surah Al-Isra' ayat 26 :

وَعَاءَاتِ ذَا الْقُرْبَىٰ حَقَّهُ وَالْمِسْكِينَ وَابْنَ السَّبِيلِ وَلَا  
تُبَذِّرْ تَبْذِيرًا ﴿٢٦﴾

*"Dan berikanlah kepada kerabatmu, dan orang-orang miskin serta orang musafir akan haknya masing-masing dan janganlah engkau membelanjakan hartamu dengan boros dan melampau-lampau".*

Apabila kita teliti, kita dapati pembaziran itu akan membawa kesan yang buruk terhadap rohani dan jasmani seseorang. Sesungguhnya Allah SWT amat murka ke atas individu yang tidak pernah bersyukur di atas nikmatnya dan mereka ini akan menerima balasan buruk daripada Allah SWT di atas kelalaian menjaga amanat harta kurniaan Allah. Kita harus ingat bahawa harta yang kita miliki bukan hak mutlak kita bahkan sebenarnya adalah hak Allah SWT. Kita hanya sebagai pengurus yang pasti akan ditanya dari mana harta yang kita perolehi dan ke mana kita belanjakan harta tersebut. Janganlah kita menganggap harta yang kita miliki itu sebagai milik kita yang mutlak dan kerana itu kita berbelanja sesuka hati.



Firman Allah SWT dalam surah Ghafir ayat 43 :

لَا جَرَمَ أَنَّمَا تَدْعُونَنِي إِلَيْهِ لَيْسَ لَهُ دَعْوَةٌ فِي الدُّنْيَا  
وَلَا فِي الْآخِرَةِ وَأَنَّ مَرَدَّنَا إِلَى اللَّهِ وَأَنَّ الْمُسْرِفِينَ هُمْ  
أَصْحَابُ النَّارِ ﴿٤٣﴾

*"Tidak syak lagi, Bahawa makhluk-makhluk Yang kamu ajak Aku menyembah-Nya itu tidak dapat menyahut sebarang seruan sama ada di dunia ataupun di akhirat; dan Sesungguhnya tempat kembali kita semua ialah kepada Allah, dan sebenarnya orang yang melampaui batas (orang yang kafir), itulah ahli neraka".*

#### **Sidang Jumaat Yang Dirahmati Allah,**

Akhirnya, marilah kita mengamalkan sifat berjimat-cermat dan bersederhana, berbelanja secara berhemat serta menjauhi sifat membazir bagi tujuan mendapat keberkatan dari Allah SWT. Mengamalkan sifat berjimat dan tidak suka membazir akan mendatangkan banyak faedah dalam kehidupan kita. Antaranya ialah;

Pertama : Dengan mengamalkan sikap bersederhana dalam berbelanja atau pekerjaan akan mendapat pahala dan keberkatan dari Allah SWT.

Kedua : Dengan mengamalkan sikap berjimat-cermat dan bersederhana



dapat menyelamatkan kita daripada muflis akibat hutang yang bertimbun kerana berbelanja secara berlebihan menurut hawa nafsu.

Ketiga : Dengan mengamalkan sikap bersederhana membolehkan kita mampu untuk bersedekah pada jalan Allah, lebih-lebih lagi menunaikan zakat yang pastinya melengkapkan lagi penyempurnaan rukun Islam.

Keempat : Kita akan mempunyai simpanan yang dapat menjamin hidup kita di saat menghadapi kesusahan.

Semoga kita sentiasa memastikan diri kita tidak termasuk di kalangan orang yang suka membazir.

أَعُوذُ بِاللَّهِ مِنَ الشَّيْطَانِ الرَّجِيمِ  
وَقَالَ رَجُلٌ مُؤْمِنٌ مِّنْ آلِ فِرْعَوْنَ يَكْتُمُ إِيمَانَهُ  
أَتَقْتُلُونَ رَجُلًا أَنْ يَقُولَ رَبِّيَ اللَّهُ وَقَدْ جَاءَكُمْ بِالْبَيِّنَاتِ  
مِنْ رَبِّكُمْ وَإِنْ يَكُ كَاذِبًا فَعَلَيْهِ كَذِبُهُ وَإِنْ يَكُ صَادِقًا  
يُصِيبْكُمْ بَعْضُ الَّذِي يَعِدُكُمْ إِنَّ اللَّهَ لَا يَهْدِي مَنْ هُوَ  
مُسْرِفٌ كَذَّابٌ



“Dan (pada saat itu), seseorang lelaki yang beriman daripada keluarga Firaun yang menyembunyikan imannya berkata: "Apakah kamu hendak membunuh





seorang lelaki kerana dia menegaskan: `Tuhanku ialah Allah? sedangkan dia telah datang kepada kamu membawa keterangan-keterangan daripada Tuhan kamu? kalau dia seorang Yang berdusta, maka Dia lah yang akan menanggung dosa dustanya itu, dan kalau dia seorang yang benar, nescaya kamu akan ditimpa oleh sebahagian daripada (azab) yang dijanjikannya kepada kamu. Sesungguhnya Allah tidak memberi hidayah kepada orang yang melampaui batas lagi pendusta”.

(Al-Ghafir : 28)

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



## KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ  
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ، لَا شَرِيكَ لَهُ،  
وَأَشْهَدُ أَنَّ مُحَمَّدًا عَبْدُهُ، وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى  
آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.  
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ فَقَدْ فَازَ الْمُتَّقُونَ.  
قَالَ اللَّهُ تَعَالَى: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ  
يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ وَسَلِّمْ عَلَى سَيِّدِ الْمُرْسَلِينَ وَارْضَ اللَّهُمَّ عَنْ  
أَصْحَابِهِ وَقَرَابَتِهِ وَأَزْوَاجِهِ وَذُرِّيَّاتِهِ أَجْمَعِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ



الْأَحْيَاءَ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ مُجِيبُ  
الدَّعَوَاتِ يَا قَاضِيَ الْحَاجَاتِ. اَللّٰهُمَّ اِنَّا نَسْأَلُكَ وَنَتَوَسَّلُ  
إِلَيْكَ بِنَبِيِّكَ الْأَمِينِ، وَنَسْأَلُكَ بِأَسْمَائِكَ الْحُسْنَى وَصِفَاتِكَ  
الْعُظْمَى أَنْ تَحْفَظَ بَعَيْنَ عِنَايَتِكَ الرَّبَّانِيَّةِ وَبِحِفْظِ وَقَايَتِكَ  
الصِّمْدَانِيَّةِ، جَلَالَةَ مَلِكِنَا الْمُعَظَّمِ سُلْطَانَ سَلَاعُورَ، سُلْطَانَ  
شَرَفُ الدِّينِ اَدْرِيسِ شَاهِ الْحَاجِ ابْنِ الْمَرْحُومِ سُلْطَانَ  
صَلَاحُ الدِّينِ عَبْدِ الْعَزِيزِ شَاهِ الْحَاجِ.

اَللّٰهُمَّ اَدِمِ الْعَوْنَ وَالْهُدَايَةَ وَالتَّوْفِيقَ، وَالصِّحَّةَ وَالسَّلَامَةَ  
مِنْكَ، لَوْلِيَّ عَهْدِ سَلَاعُورَ، تَعَكَوْ أَمِيرِ شَاهِ ابْنِ السُّلْطَانَ  
شَرَفُ الدِّينِ اَدْرِيسِ شَاهِ الْحَاجِ فِيْ أَمْنٍ وَصَلَاحٍ وَعَافِيَةٍ  
بِمَنَّكَ وَكَرَمِكَ يَا ذَا الْجَلَالِ وَالْإِكْرَامِ. اَللّٰهُمَّ أَطْلُ  
عُمَرَهُمَا مُصْلِحِينَ لِلْمُوظَّفِينَ وَالرَّعِيَّةِ وَالْبِلَادِ، وَبَلِّغْ  
مَقَاصِدَهُمَا لِطَرِيقِ الْهُدَى وَالرَّشَادِ.



Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam khususnya negeri Selangor, sebagai negeri yang maju, sejahtera dan berkebakikan.

Justeru kami pohon kehadiran-Mu ya Allah, tetapkanlah iman kami, tingkatkanlah amal kami, kukuhkanlah perpaduan kami, murahkanlah rezeki kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, kembalikanlah kami ke jalan yang Engkau redhai, lindungilah kami daripada ujian-Mu yang berat seperti banjir besar, kemarau panjang, wabak penyakit, persengketaan, kemiskinan dan lain-lain, supaya dengan demikian, negeri kami akan sentiasa bertambah makmur dan berkat.

رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ وَاجْعَلْنَا  
لِلْمُتَّقِينَ إِمَامًا. رَبَّنَا آتِنَا فِي الدُّنْيَا حَسَنَةً وَفِي الْآخِرَةِ  
حَسَنَةً وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي  
الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ  
يَعْظُمُ لِعَلَّكُمْ تَذَكَّرُونَ ﴿٩٠﴾



فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَى نِعَمِهِ  
يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ وَلَذِكْرُ اللَّهِ أَكْبَرُ  
وَاللَّهُ يَعْلَمُ مَا تَصْنَعُونَ.

\*\*\*

Zainal/Li